

Gloppen folkebibliotek i 2020 – eit annleis år

Eit aktivt, men annleis bibliotek-år: Koronastenging frå 12.mars og ulike grader av restriksjonar resten av året, meir aktivitet via eigen nettstad gloppenbibliotek.no og sosiale media som Facebook og Instagram. Den digitale formidlinga auka, og vart meir variert, frå informasjon om bibliotekressursar, til live-streama arrangement både digitalt og med fysisk oppmøte. Det var mykje internt arbeid gjennom året med innsparingstiltak.



Bildet: Etter å ha vore heilt stengt i nesten tre veker, starta biblioteket opp med «bestill og hent»-ordning. Bøker, lydbøker og film vart pakka i posar og levert ved inngangsdøra. Biblioteksjef Torill Berge utanfor inngangsdøra til Trivselshagen.

Lesekiosken vart opna i august. Den tidlegare telefonkiosken i krysset Krånavegen/Nordstrandsvegen vart pussa opp og fylt med aktuelle bøker, i regi av Foreningen !les. Her kan alle finne seg ei bok og ta med heim, til odel og eige. Har du ei bok å gje vidare, kan du gjerne sette den igjen i lesekiosken. Gloppen folkebibliotek er fadder for ordninga, og har tilsyn med lesekiosken.



Så runda Gloppen folkebibliotek sine **180 år** sidan skipinga dette året. Det var planen å markere dette med ei stor-hending, nemleg besøk av forfattaren Edvard Hoem. Men som mange andre ting dette året, måtte det avlysast av smitte-omsyn.



Bildet: Byrkjelo bibliotek, ein innbydande møtestad

2020 viste seg å vere siste driftsåret for **Byrkjelo bibliotek**, etter samanhangande drift i 180 år. Filialen har også vore møtestad på kveldstid for lokale lag og organisasjoner. Bibliotekfilialen på Byrkjelo hadde eit utlån på **4.352** i 2020, og vart lagt ned 1.1.2021.

Biblioteket i Hyen har vore i drift sidan «nokre år etter at kyrkja var bygd» i 1876, iflg. Per Sandal si bok «[150 år med bøker : Gloppen folkebibliotek 1840-1990](#)». Før den tid lånte hyarane på Vereide. Ved starten av året 2020 var status for Hyen filial å vere i «pause til ny skule er klar». Budsjettvedtaket for 2021 medførte at Gloppen folkebibliotek skulle drive vidare med kun ei avdeling.

Biblioteket har fått budsjettkutt til liks med dei fleste andre avdelingar i kommunen, men fekk også midlar til sokalla «**meirope bibliotek**» i 2021. Vedtaket lyder slik: «For at alle innbyggjarar framleis skal ha tilgang til eit bibliotek, vil ein innføre meirope bibliotek på Sandane. Dette vil auke publikumstida med i overkant av 60 timer i veka gjennom sjølvbetening.»



Bildet: Personalet i 2020 (to heile stillingar, resten deltid). Her smiler vi breitt i starten av mars 2020. F.v. Ann-Kristin Vik Fløtre, Marthe Mølstad, Torill Berge, Ann-Kristin Hovstad, Lindy Paulen.

Utlåns- og besøkstal

Trass tre veker med heilt stengt bibliotek, etterfylgt av «bestill og hent»-ordning i nesten to månader, vart det lånt ut **40.361** bøker og andre media. Ikkje verst, tykkjer vi. Dette utgjer ein nedgang på 19 % i høve til rekordåret 2019. Biblioteket på Sandane hadde 48.700 besøkande i 2020, derav 10.900 på studierommet.

2020 (Sandane, Byrkjelo): 40.361

2019 (Sandane, Byrkjelo): 49.725

2018 (Sandane, Byrkjelo): 48.711

2017 (Sandane, Byrkjelo og første halvår Hyen): 44.888

2016 (Sandane, Byrkjelo og Hyen): 47.447

Mest utlånte titlar for barn

1. Visste du at-? Sau / Anna Fiske (Leseland)
2. Reisen til Jotundalen / Malin Falch (Nordlys)
3. Steinvakteren / Kazu Kibuishi (Amuletten)
4. Tanentrøbbel / Anna R. Folkestad (Leseland)
5. Krabbekrise / Anna R. Folkestad (Leseland)

Mest utlånte titlar for vaksne

1. Marte og Anders : mellom Ryggjatunet og Minnesota / Arne Rygg
2. Full spredning / Nina Lykke
3. Solsøsteren / Lucinda Riley
4. Over horisonten / Jojo Moyes
5. Datteren / Anne B. Ragde